

Aus dr Haamit

■ De Impferei is gar net esu aafach...

När des mir uns richtich vorstenne: des Impfn is total nutwendich, dodormit mir nu endlich emol des daamische Virusding samt dare ganzn Pandemie, Lockdaun unsuwetter luskriegn un wieder zu nern normaln Laabn mit Zammekinftn, harzling Imarmunge un sunstichn angenehme Dingln iebergieh kenne, Punkt, naa Ausrufezaagn!

Aber abn de Impferei hat aa esu ihre Tüekn. Iech wollt miech su schnell wie möchlich, getrei dar vürgeschriebne Berechtigungsgrupp ab 70 Gahrn impfn lessn, also bi iech ze mein Hausdokter un dar saat, iech ka erscht in e paar Wochn drakumme, weil – is wär net genuch Impfereistoff do - un des kennt also noch eweng dauern. Un gelei dornooch hatt iech in unnerer Frein Press gelaasn, des in den Helios-Kranknhaisl in Aue grad ewos an Impf-Laafn is. Do hob iech gelei aagerufen, des haaßt, e schiens paar mol musst iech schu probiern. Dann war ne schiene gunge weibliche Stimm dra un die tat miech gelei forn nächstn Maantich um viertl nooch Viere eilodn. Do hat miech mei Fraa aa dann hiegefahrn, esu zah Minutn vor Viere bi iech stracks zu den mit nern Pfeil ausgeschildertn Zentrum gange. Iech tat noch ne ältere Fraa traffn, die eweng usicher war, wus nu hiegeht un hob se mietgenomme.

Aber: die Tür war zu un drinne fuchtlt ne Fraa mit ihre Arme imhaar un bedeit, des mir für laafn sölltn un zum Haupteingang reikomme müsstn. Also, nicht wie dortn hie, do krichtn mir zwee in blaun Aufklabber nagedatscht un dann nicht wie den ellnlange Gang drinne zu den Zentrum. Dortn saäßn un standn schu su im de 15 Weiblein un Männlein.

Nu ja, dacht iech, de bist ja um 16.15 bestellt, des wird schu klappn. Aber erscht emol kloppts hinner mir an dare Tür, wu mir vorhinst net rei kunntn. Draußn e Ehepaar un den hob iech aa mit Handzaagn bedeit, desse när zen Haupteingang reikomme kenne. Die zwee warn kaum dor Eck nim, do kloppts schu wieder an dor Tür. E Maa stand dorfier. Iech tat ihm aa zeign, wu ar lang gieh müsst un dreh miech wieder im. Do polderts an dare Tür ganz uvorschamt laut, als wenn ar se gelei eihaa wollt, un dar Maa schwingt mächtig mit seine

Arm imhar. Nu do hab iech ihm in Vugl gezeichnet un noch emol mit meiner Hand hiege wiesn, des ar när zen Haupttor reikomme kaa, un dreh miech wieder im. Glei drauf is mirs durch un durch gefahrn, iech dacht dar Kerl drischt de Scheib vu dare Tür nei, su tat dar hantiern un lusschreie: „Sölch biese Leit hob iech dohiertn noch net dorlabt! Drick endlich

die Tür auf un läss miech rei, uhne miech gieht hier gar nischt!“ Un dodorbei schwengt ar mit sein Taschl auf un ab.

Dar Dorschrockne, also lech, tat mei ganze Kraft gegn die Tür warfn – un siehe da – die gieht auf! Des war ja su e Nutausgang, dar när vu drinne nooch draußn aufgieh muss. Dar Maa stolpert nu rei, guckt miech gruß aa un eweng vorsehnlich saat ar: „Des is eier Glick, des ihr miech endlich reigelessn habt, ansinstn kennt ihr eire Impferei vorgassn – iech hob hier is Sogn – iech bi hier dor Dok!“ Des do allis gelacht hat, brauch iech bestimmt net wetter aufzuschreibn...

Dann wurn suviel aufgerufn wie drinne Stiehl standn, e paar Schwastern tatn jedn e schiens paar Blattle zen Laasn un Ausfilln gabn. Wu dar Dokter-Maa mein Name aufrufn tat, saat iech ze ne: „Hier kimmt dor Biese!“ „Rei mit dir un hiegesetzt!“ Ze mein Glick hatts bei de ältern Senjorn eweng mit ne Schreibn gehaport un do kunnt iech ne ganze Reih vu danne ieberhuln un war esu 20 nooch Viere trotzdem dra: „Is noch ewos ze beachtn?“ freech iech de Spritzärztin. „Arm har un Ruh gabn!“ - E kurzer Pieks - „Noch ne viertlstund draußn hiesetzn un dann hamgieh!“ Des wars.

Nu do, --- Glückauf --- eier Schmidt!